

19-04-2016

UPA 2016/31

Tasiilami qimarnguimmik pilersitsinissamik periarfissat eqqartorneqarnissaat pillugu Naalakkersuisut Kommuneqarfik Sermersuumut saaffigineqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq Laura Táunâjik, Siumut)

Persuttaaneq naaggaarparput. Arnanut persuttaaneq naaggaarparput. Meeqqanut persuttaaneq naaggaarparput.

Taamak naatsigisumik tunngavilersuuteqarluni, uani siunnersuummi pineqartumi tassalu Tasiilami qimarnguimmik pilersitsisoqarnissaanik anguniagaq, oqaaserpassuit aqputigeqqaanngikkaluarlugit ingerlaannaq akuerineqaqqullugu innersuussinermut oqaaseqaateqartoqarsinnaavoq.

Taamakkaluartoq pingaaruteqarpoq aamma eqqartussallugu, ilaqutariit ajornartorsiummik taamak ittumik nalaataqarsimagaangata qanoq ingerlaqqissinnaanerit.

Annersaasarneq ilaqutariinni pisartoq unitsinniarlugu pinaveersaartinniarlugulu qanoq iliuuseqartariaqarpugut?

Atassut –mit isumaqarpugut, inuiaqatigiinnik paasitsitsiniaanerit annertuut ingerlaavartullu ingerlattuarnissaat pisariaqartoq. Taamaaliornikkut annersaasarneq tamakkiisumik pinaveersaartinneqarsinnaammat.

Annersaasarnermik ajornartorsiummik ilaqutariit aqqusaagaqaraangata pingaaruteqarpoq, pingaartumik siunersuinikkut aammalu ilaatigut katsorsaanikkut sukkasuumik aaqqiinikkut ikiorsiisarnissaq aqputaasariaqartoq, Atassut-mit isumaqarpugut.

Arnap - meeraqaruni meeraqanngikkuniluunniit - aappaminillu annersartissimasup inuunerminillu allannguerusuttup, ingerlaannaq pitsaanerusumik tigussaannerusumillu ikiorserneqartarnissaa aammalu aaqqiivigineqartarnissaa aqputissiuunneqartariaqartoq, Atassut-mit isumaqarpugut.

Taamatut piaartumik ataavartumillu aaqqiisarnissaq pisariaqarpoq, inuiaqatigiittut ananersaanermut akuersaartutut inississanngikkutta.

Naggataatigut Atassut isumaqarpoq ajoraluartumik suli qimarnguiit nunatsinni amerlanerit atorfissaqartinneqarput . Ajoraluartumimmi aappariit akornanni annersaasarneq suli annertuujuoq politiit angerlarsimaffinnut eqqissiviilliortoqartillugu aggersatarneqarneranni kisitsisit takutittaannarpaat.

Annersaasoqartillugu aappariinni sanngiinneraasoq aammalu meeqqat innarlerneqartarnerat akuersaarneqarsinnaatsoq pisartorlu unitsittariaqarparput. Tamanna ilaatigu qimarnguinnik pilersitsinikkut sukkasuumik angusinnaavarput. Taava suliniutit qulaani taariikkavut aallartinneqartassapput.

Taamatut oqaaseqarluta Atassut-mit siunnersuut akueraarput.